

President di Corte Comun di Husticia mr. de Lannoy

TRABAO DI UN JUEZ DEN UN COMUNIDAD CHIKITO TA SUMAMENTE DIFICIL

ORANJESTAD(AAN) -- Ayera na ocasion di instalacion di Juez mr.drs. T.D. Croes - Fernandes Pedra, Presidente di Corte Comun di Husticia di Antiyas Hulandes y Aruba, mr. de Lannoy a duna di conoce cu entre tanto ta dos aña pasa cu atrobe tur Jueznan ta hunto pa un instalacion di un Juez nobo pa Aruba.

Sorto di ocasionnan asina, no ta presenta nan mes tur dia. E instalacion di ayera seguramente tampoco.

JUEZMAN ARUBIANO TA SCHAARS

Mr. de Lannoy a sigui bisa cu ayera a instala un Arubiano como Juez den su propio pais. E ultimo vez cu esaki a tuma lugar tabata 7 aña pasa unda cu Juez mr. Foy a worde instala.

Instalacion di Jueznan Arubiano ta schaars y pesey mes especial. E instalacion di ayera ta mas especial ya cu ta trata aki di un dama Arubiano.

PROMER DAMA NOMBRA COMO JUEZ

Segun mr. de Lannoy, te con leu e por a averigua esaki ta e promer den e 126 aña di historia di Corte Comun di Husticia cu un dama ta worde instala como un Juez. Mr. de Lannoy a expresa palabranan di honor pa na e evento unico aki di presenta e Juez nobo Arubano.

Ta trata aki señora. mr.drs. Theresa Fernandes Pedra, kende a nace na Aruba. Mr. de Lannoy a expresa cu e no por bisa e fecha di nacimiento di e Juez pasobra esaki ta contra e "politess" pa cu un dama.

Si el a notifica cu mr.drs. Croes - Fernandes Pedra ta casa cu señor George Croes, cu e pareha tin 4 yiu y cu e promer yiu ya a haya su promer grado academico.

Señora Croes a studia na Colegio Arubano caminda na 1968 el a haya su diploma HBS. Despues el a studia psicologia na un Universi-

dad na Amsterdam y na 1975 el a gradua pa e examen doctoral.

Señora Croes desde 1975 te 1982 a traha como psicologo na Psychologisch Didactisch Bureau di Departamento di Enseñanza.

Di 1982 pa 1983 el a traha como particular na Psychologisch Adviesbureau Arends. Di 1983 te 1986 el a traha como psicologo na Direccion di Salubridad Publico. Na 1986 señora Croes a bay Hulanda caminda el a sigui su estudio den ley na Rijksuniversiteit na Leiden y na 1989 el a haya doctoraal Nederlands recht.

El a regresa na Aruba y na 1990 el a ser nomber como "rechterlijk ambtenaar in opleiding bij het Gerecht van Aruba, unda el a core stage na Griffie y Parket.

Desde September 1993 te Augustus 1994 el a core stage na Arrondissementsrechtbank na 's-Gravenhage y relaciona cu esaki cu e Decreto Real fecha 9 Mei 1994 el a ser nombra como Juez suplente di Corte.

Cu Decreto Real di 15 di December 1994, señor Croes a ser nombra como miembro suplente di Corte Comun di Husticia y finalmente entrante 1 Augustus 1995 el a ser nombra como miembro di Corte Comun di Husticia di Antiyas Hulandes y Aruba.

AWOR ARUBA TIN 6 JUEZ

Cu nombramento di señor Croes, e cantidad di miembronan di Corte Comun di Husticia di Aruba a aumenta di 5 na 6. E aumento aki tabata necesario mirando e aumento di trabaonan di Juez na Aruba.

Segun mr. de Lannoy, cu e nombramento aki di señora Croes, atrobe un paso ta worde haci na Arubianismo di Corte.

Mr. de Lannoy a indica cu relaciona cu e Antianisacion y Arubianismo, e aña aki ta uno top. Cu mesun Decreto Real manera señora Croes tambe un Antiano-

mr. dr. Brian Mezas a ser nombra como miembro di Corte Comun di Husticia y dentro di poco lo ser instala na Curaçao.

TRABAO DI UN JUEZ NO TA FACIL

Mr. de Lannoy a sigui bisa cu señor Croes a escoge pa ta Juez den un comunidad chikito. Trabao di un Juez ta uno dificil. Trabao di un Juez di un comunidad chikito ta mucho mas dificil.

Un Juez mester tuma decisionnan ariba hendenan of interesnan di hendenan. Segun mr. de Lannoy, no tur e hendenan aki lo ta di acuerdo cu e decisionnan y sigur no esnan cu e decision ta den nan contra of ta worde condena na un castigo.

Algun di e hendenan aki lo haya cu Juez no a com-pronde nan y cu a actua inhusto cu nan. Esaki por bira e impresion di e persona si su abogado no suficiente informacion of e persona totalmente no a ser informa.

Tipo di personanan decep-ciona asina lo tuma e decision di Juez na malo. Den un comunidad chikito caminda tur hende conoce e Juez of ta pretende di conoce, lo tuma e decision di Juez personalmente na malo.

Mr. de Lannoy ta haya cu ariba e punto aki, un yiu di tera cu tin su amistadnan y famia lo tin extra dificultad.

Un Juez den un comunidad chikito no ta desconoci. E lo mester realiza cu door di cu e ta conoci cu su decisionnan por worde tuma algo personalmente di dje.

Mr. de Lannoy a indica cu un Juez lo mester ta prepara pa ataquenan personal di un persona cu ta escoge e caminda aki envez di e caminda legal.

E ataquenan personal aki por sali den publicidad y esaki ta haci e trabao di un Juez mas dificil en especial den un comunidad chikito.

Personanan mal contento cu decision di Juez den comunidatnan grandi manera Hulanda no ta forma noticia pa Telegraaf, Story

of Privé pero den un comunidad chikito esaki por presenta pa dianan largo ariba e front page.

Tur esaki por perhudica e reputacion di e Juez, siendo cu e Juez no a haci nada otro cu tuma un decision ora cu el a ser pidi pa tuma un decision den un caso cu e no a ocasiona y den cual e no tin arte ni parte.

Den caso cu e Juez haya e honor di expresa su mes den prensa, e unico cos cu e por bisa ta cu el a haci su trabao manera mester ta y cu e motivacion di su decision por worde lesa.

Mr. de Lannoy a bisa

señora Croes cu e sa cu ora Croes a scoge pa bira Juez cu el a realiza cu el a tuma un trabao hopi dificil y responsable ariba su schoudeman.

Mr. de Lannoy ta convenci cu señora Croes por haci e trabao aki. E ta desea señora Croes hopi sabiduria y forza cu su trabao. El a felicita señora Croes cu e resultado aki cu ta e culminacion di un estudio largo cu Croes a hiba. El a felicita tambe e famia di Croes esta su esposo y su yiu. Mr. de Lannoy a expresa cu Croes su famia por ta orguyoso ariba señora Croes.